

ASO LULU, 5 IULAI 2017

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoao Faitulafono.

Ia ma ou te faatalofa atu foi i leni taeao fou ua aumai e le Atua lo outou soifua ma lo tatou ola, tatou te momoe ma manu e le fati ae sau mala e atiai. Peitai, ana le seanoa le Atua na ia i tatou i leni taeao tatou te le maua lona filemu ma lona matagofie, ua tatou feiloai foi i le lagimama ma le soifua manuia.

ISI FAASILASILAGA A LE FOFOGA FETALAI

FOFOGA FETALAI: Ou te faasilasila atu i le paia o le Fono Aoao Faitulafono, ua ou taulimaina nei le Faasilasilaga mai le Vaega Faaupufai e pulea le Malo e aloaia ai le tofiaina o le Afioga Tuimalealiifano Vaaletoa Sualauvi le II mo le Tofi O Le Ao o le Malo.

E tusa ai ma le Mataupu 18(5)(a) o le Faavae o le Malo Tutoatasi o Samoa, ou te faataatia lea Faasilasilaga mo le tofiaina O Le Ao o le Malo i le Laulau a Fono o le Fono Aoao Faitulafono.

O le Mataupu 18(1) o le Faavae, o lo o manaomia ai le tofia e le Fono Aoao Faitulafono O Le Ao o le Malo, i luga o le fautuaga a le Vaega Faaupufai o Pulea le Malo.

Ou te tuuina atu le Fesili i le Maota e faapea:- *Po o le a faamaonia le Faasilasilaga mo le Tofia o le Afioga Tuimalealiifano Vaaletoa Sualauvi le II i le tofi O Le Ao o le Malo.*

Na faamaonia le lafo mo le tofia ma filifilia e le Fono Aoao Faitulafono le Afioga Hon Tuimalealiifano Vaaletoa Sualauvi II e avea O Le Ao o le Malo mo le isi 5 tausaga.

FOFOGA FETALAI: Ia, ma o le avanoa leni ou te tapa lau Afioga i le Palemia mo sau saunoaga.

5 IULAI 2017

**FAAMATALAGA FAA-MINISITA A LE PALEMIA SUSUGA HON
TUILAEPA AUUELOA FATIALOFA LUPESOLIAI LOLOFIETELE
NEIOTI AIONO GALUMALEMANA Dr. SAILELE MALIELEGAOI**

**Susuga Hon TUILAEPA AUUELOA FATIALOFA LUPESOLIAI
LOLOFIETELE NEIOTI AIONO GALUMALEMANA Dr. SAILELE
MALIELEGAOI (Palemia):** Lau Afioga i le Fofoga Fetala faapea foi le mamalu i sui usufono o le Fono Aoaofaitulafono o le Malo Tutoatasi o Samoa, o paia lava ia e faasino i Aiga ma latou Tama, Tama foi ma o latou Aiga, tainane le Usoga a Tumua ma Puleono i Salafai. Ae a le faafogafoga tapuai mai o le Kovana Sili ma le Faigamalo a Tutuila ma le Motusa, o mamalu lava aua le Faleagafulu ma le Nofo a Maopu, Faatui ma Tootoo ma upu i le Manuatele. Ae matua lava le tuu i le faanonogamanu i Auauna a le Atua o lo o tapuaia o tatou faiva.

I le tofia ai o le Afioga i le Tui Aana e avea ma Ao o lo tatou Malo, o le isi lenei taeao fou i upufai o le Malo Tutoatasi o Samoa ma ona talatuu. E avea ai au ma sui o le Maota lenei, e momoli ai le faamalo i le Afioga Tuimalealiifano Vaaletoa e tusa ai ma lona valaauina. Sa ia galue i le Malo e avea o se alii Malu o le Malo, o se alii Loia foi faauuina, mulimuli ane ai na tofia ai i le tofiga mamalu o le Sui Tofia mo le silia i le 20 tausaga.

I le filifilia ai O Le Ao o le Malo ina ua tuumalo Malietoa Tanumafili II i le tausaga 2007, sa i ai lava le suafa o Tuimalealiifano i le faiga filifiliga faalua O Le Ao o le Malo i le 2007 ma le 2012. Peitai, e le i faamanuiaina, o le finagalo lena o le Atua, e te onosai, e te le i saunia i lenei taimi mo le tofiga O Le Ao Mamalu. O le talitonuga lea maumauai i le Palemene lenei, o tofiga uma e mai le Atua. O lea na ia onosai ai pea ma faaauau lana tautua i le Fono a Sui Tofia. E faalua ona agai pea le Maota lenei e tofia le Afioga i le Tui Atua e avea ma Ao o le Malo Samoa, ma e faaiuina le tofiga o lo o i ai nei i le aso 25 o le masina lenei. O lenei ua valaau le Atua e ala i le musumusuga lilo i sui usufono o le Fono Aoaofaitulafono ma le latou foi faiga filifiliga faale-Vaega Faaupufai a le Vaega lenei e Puipuia Aia Tatau a Tagata e faapei ona aiaia ai i lalo o le Faavae.

Ou te faamalo foi i le Afioga i le Tui Atua, lau Afioga Tupua Tamasese Efi e tusa ai ma lou tauaveina o le tofiga O Le Ao Mamalu o le Malo i lenei 10 tausaga, sa faatino ai e lau Afioga lou tofiga i tulaga mamalu ma le taualoa. O lo o mautinoa le i ai pea o le agaga naunautai i lau Afioga e tautua pea i lo tatou atunuu i so o se avanoa. Faamalo le tauatai, faafetai le tautua Malo. E le tau laeia foi le maaosofia i le tele o tausaga o lou soifua sa e galue ai mo le Malo o Samoa i tulaga tofi mamalu uma lava o le tatou Malo, Faipule, Palemia o le Malo, Sui Tofia, Ao Mamalu o le tatou Malo. Na o le Atua Na te avatu Malo mo lou atunuu o Samoa.

O le filifiliga O Le Ao Mamalu, sa faatino lava i faiga masani faatemokarasi. E le o se filifiliga na faigofie lona faatautaiga, mo se atunuu laitiiti, toagaogao, ae ua fesautai gafa o aiga. Leitioa fatu se taofi, o Samoa o le aiga. O le lagona na tupu ae i le faiga filifiliga lenei, e i ai isi auala silisili taugamalie e ao foi ona tagofia e lo tatou Malo e faatino ai suiga o tofiga i le lumanai, e tapena mamao i ai i latou ua tofia ma taliagofie ai foi ni suiga o tofi ua tatau ma talafeagai faaletulafono.

5 IULAI 2017

**Faamatalaga Faa-Minisita a le Palemia Susuga Hon Tuilaepa Auelua
Fatialofa Lupesoliai Lolofietele Neioti Aiono Galumalemana
Dr. Sailele Malielegaoi**

O isi ia teuteuga lelei o tatou Tulafono e atili maua ai le nonofo lelei ma le agaga feoeoeai i Taitai o Samoa.

Ia sagai ane ai o le tai i lau Afioga i le Tui Aana, ia faaosofia moegaluaga ma utupupuina fulu o le segaula, maua le tofa ma le soifua lelei e faatino ai tiute ua faaee atu i ou tauau. A o upu taiala a lo tatou Alii, “*O le ua taitai, tautua, o le foi ua muamua, mulimuli.*” O ou mama na, faamanuia le Atua i lou valaauina.

Lau Afioga i le Fofoga Fetalai, pe a maea le faaiuga foi i le aso tonu e faia ai le faatautoga, ona faapena foi lea ona fofogaina le mamalu o le Maota mo le faamoemoe i se aso o i luma. Soifua ma ia manuia.

FOFOGA FETALAI: Malo faafetai malele i lau Afioga i le Palemia po o le Taitai foi o le Malo. Ua logo faa-Tutuila lenei taeao i le saunoaga manino ma le malamalama i lau Afioga i le Palemia.

Ma lou faaaloalo ou te tapa lau Afioga mo se lafo ina ia faapena ona tolopo ai Taulumaga o le tatou Fonotaga i lenei taeao.

LAFO MO LE TOLOPOINA

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai, ou te tulai atu e faatu le lafo, *Ina ia faataatiaese Tulafono Tumau 30(2) e avanoa ai le fetuunaiga o Aso Fono ina ia tolopoina ai nei Taulumaga a le Fono Aoao Faitulafono seia aulia le Aso Lua, 17 Oketopa 2017.*

Faaluaina e le Minisita mo Tupe Maua, Minisita mo Faatoaga ma Faigafaiva ma le Minisita mo Aoga, Taaloga ma Aganuu.

Na faamaonia le lafo ma tulai ai Taulumaga o le a tolopo seia aulia le aso 17 Oketopa 2017.

FOFOGA FETALAI: Ae tatou te le i tolopo ou te tapa lau Afioga i le Sui Fofoga Fetalai e te tulai maia e fai lou tofi Aoao Fesoasoani e te faaiuina le tatou Fonotaga i se tatalo.

Na tolopo Taulumaga a le Fono Aoao i le itula e 9:33 i le taeao seia aulia le itula e 9:00 i le taeao o le Aso Lua, 17 Oketopa 2017.